

pariha—i etahi pariha ka tukua te whare karakia kia takoto noa ana. He mea pai te haŋa i te whare karakia. Pai ke atu ia te mahara ko te whare karakia he Whare ma te Atua, ko te mea pai hoki mo taua whare ko te ata tiaki, te whakapai tonu. Ka pehea mai te Atua me ka wareware noa matou ki tona Whare. E kore ianei e mea he wareware tera ki a Ia ano? Ko te tikanga pai mo te whare Minita, mo te whare karakia me inihua, me tuku hoki ki etahi kairupuri (Trustees) hei pupuri mo te Hahi.

5. *He Kai-mahi Wahine.*—Ka puta taku whakawhetai ki ŋa wahine e mahi ana i waenganui i a koutou i te iwi Maori. He tumanako hoki toku kia tokomaha noa atu aua wahine. Ki taku mahara ko te mea pai kia takirua ŋa wahine pera ki te wahi kotahi. Ko te mea pai hoki kia mohio tetahi o raua ki te tiaki turoro. He mahi pai tenei ma ŋa kotiro kua puta mai i te kura i Hukarere.

6. *Kai-karakia.*—He mahi pai te mahi a te Kai-karakia, he taŋa hoki tera ma te Hahi—Ka nui toku hiahia kia kurangia ŋa Kai-karakia e ŋa Mihinare kia kaha ai ratou ki ta ratou mahi nui. E mea ana ahau kia tukua he raihana ki te Kai-karakia hei tohu he mana tona ki te mahi.

7. *Kupu Whakamutunga.*—He mea pai kia whakaohokia ŋa taŋata o te Hahi ki te ŋakau karakia. Eŋari kia matua whakapainga tetahi pariha katahi ka haere te taŋata ki reira whakaoho ai, kia ata whakaarohia hoki ŋa hua o taua mahi whakaoho, ara kia whakaritea he karaihe Paipera, he kura hoki mo te Whakau. Ko te Whakau te wa e maia ai te taŋata ki te whakaae nui ko te Karaiti tona Ariki, ma reira e tokomaha ai, e ŋakau nui ai te huŋa taŋo Hapa. He tautoko taku ki a tohe etahi o koutou kia whakarerea te kai waipiro, ka pehia hoki ŋa hiahia kino katoa o te kikokiko.

Ma te Atua e tohutohu, e manaaki ŋa mahi a tenei Hui. Ma te Wairua Tapu tatou e arahi kia mahi tahi tatou kia whai-pai ai te iwi Maori. Kia mahara koutou ki te whakapono o o koutou tupuna me te mahi tonu i ŋa mea katoa e tukua e te Atua hei mahinga ma koutou.